

編號 6 號

【鐵甲武士——雞油蛄】邱鴻春原作

熱天來咧！六月半邊仔開始，有兜公園抑係山林步道，下把仔會聽著打早出來運動個人講，有看著雞油蛄咧。可能盡多人毋知麼个係雞油蛄，就係國語講个「獨角仙」啦！

伯公岡个萬善爺廟，盡難得廟方有心，慢慢仔向公園化來經營。在廟坪面前个側旁，做一隻雞油蛄个生態教育園區，裡肚種盡多叢白雞油樹。經過三年个照顧，樹仔總算大叢起來咧，雞油蛄个復育也盡成功。

今年七月份，會第一擺舉辦，雞油蛄生態教育結合在地小農个大型活動。期待活動鬧棚圓滿，做得慢慢仔帶動地方个發展，甚至變成在地文化个特色景點。這係避暑期間最好个遶寮位所，不管係摆阿爸、阿姆共下駛車仔來，抑係坐火車來，全盡利便。毋過愛提醒一下，最好在朝晨八點半前來到，越早會看著越多，越晝斯越少，因為雞油蛄乜當驚熱，會囡起來睡目哦！

可能有人會問，雞油蛄係麼个變个？其實佢就係雞嫲蟲變个。又有人會問，仰會安到「雞嫲蟲」恁生趣个名仔呢？因為雞嫲蟲當肥、當大尾，專門囡在地泥下；頭擺莊下人大部分有畜雞

仔，雞嫲會渡等雞子在樹園肚，用腳來緊蹶尋食¹，這係雞嫲最好食乜最有肉个點心，正分人安到雞嫲蟲。

雞油蛄个出世，主要係愛傳代下去，野生个壽命，差毋多有個半月到兩隻月左右，若係人畜个，可能斯一隻月定定。野生个，最好食个東西，就係白雞油樹个樹乳²；人畜个，做得分佢食西瓜摆黃梨。公个雞油蛄在頭那頂有生一隻長角，係用來相打、爭地盤、爭舖娘用个，做得摆對方撬起來拂出去，非常砸哦！嫲个無生角，摆公个一比斯知，盡好認，係挖泥囡空个高手。除了逐日日時頭囡泥空歇睏以外，最重要个係，愛生卵該時，會尋一隻最營養、最秘密个位所生卵。等細雞嫲蟲出咧，正有東西好食，又毋會有其他个危險、毋會分雞嫲來食忒。

所以下二擺，你摆阿姆抑係阿婆在菜園肚改園，係有看著雞嫲蟲，愛遽遽摆佢奔泥轉去，正毋會害佢分鳥仔食忒，分佢做得平安快樂長大，變成靚靚又勇敢个鐵甲武士——雞油蛄哦！

¹ 緊蹶尋食：音 gin' kied` cim shid`；用腳翻找食物。

² 樹乳：音 shu+ nen`；樹的汁液。